

Ramazanska čestitka Izvršnog i Nadzornog odbora BIC Hamilton

Draga braćo i sestre!

Mubarek mjesec nam dolazi kao najbolja škola za dušu u kojoj je učitelj Kur'an Časni i Pejgamber Odabrani, u kojoj je post terapija za bolesti duše, posebno za bolesti ljubomore, licemjerja i samozaljubljenosti. Stoga, iskoristimo ramazan za liječenje naše duše kao najbolji način da izliječimo bolesti u našem društvu, u našoj zajednici u kojoj svaki pojedinac može postići uspjeh na ovome i spas na drugome svijetu. Ramazan je vrijeme a post ibadet na način da liječimo dušu od mržnje, da liječimo srce od pakosti, da liječimo jezik od ružna govora, da liječimo oči od ružnog pogleda, da liječimo ruke od nevaljala posla, da liječimo sebe, svoju porodicu, svoju zajednicu i svoje društvo od poroka koji nam život čini teškim i neizvjesnim. Ramazan je škola u kojoj se čovjek uči da voli Boga i čovjeka. Zato dok postimo u ramazanu, okrenimo se oko sebe i ne zatvarajmo oči pred potrebama siromašnih i onih koji ne mogu živjeti od svoga rada ili uopće nemaju priliku da rade i da zarade za sebe i svoju porodicu.

Budimo solidarni i suosjećajni jedni prema drugima, jer to je najviši stupanj pobožnosti zbog koje je Uzvišeni Allah propisao post da bi se sit čovjek sjetio gladnih i da bi se imućni ljudi brinuli o siromašnim i nemoćnim.

Molimo Allaha Uzvišenog da nam ramazan protekne u miru i bereketu, da nam se srca zbliže u vjeri i ljubavi, da nam Allah ukabuli ibadet posta i usliša naše dove za zdravlje i sreću svakog člana naše zajednice.

Sa uvjerenjem da će nam mjesec ramazan donijeti Allahovu milost i oprost, svim članovima naše zajednice želimo sretne i berićetne mubarek dane ramazana!

Bilten izdaje: IO BIC Hamilton
Glavni i odgovorni urednik: Emir Ramić
Uređivački kolegij: Svi članovi IO

INFORMACIJA O USVAJANJU DRUGE REZOLUCIJE O GENOCIDU U SREBRENICI U KANADSKOM PARLAMENTU

Institut za istraživanje genocida Kanada je informisao Bošnjački islamski centar Hamilton da je Kanadski parlament usvojio drugu rezoluciju o genocidu u Srebrenici. Prva je usvojena povodom 15 godina od genocida 2010 godine. Sa obe rezolucije Kanada politički priznaje sudski dokazan genocid u Srebrenici, proglašava 11 juli Danom sjećanja na žrtve genocida u Srebrenici u Kanadi i obavezuje se da će svake godine u mjesecu aprilu, mjesecu borbe protiv genocida, genocid u Srebrenici biti predmet izučavanja i istraživanja.

U nedjelju 14. juna 2015. sa početkom u 11:30 a.m. u prostorijama BIC Hamilton održava se polaganje završnog ispita iz vjeronauke i škole bosanskog jezika.

Izvršni odbor BIC Hamilton poziva sve polaznike mekteba i škole bosanskog jezika, sve roditelje i sve zainteresovane članove da dođu i tako svojim prisustvom uveličaju ovu veliku manifestaciju. Dođite da se kroz druženje upoznate šta su naša djeca naučila iz vjeronauke i škole bosanskog jezika. Svim polaznicima koji zadovolje biće uručene diplome. Za sve prisutne IO BIC Hamilton priređuje barbikju.



Pomozite izgradnju Bošnjačkog Islamskog Centra
Pratite nas putem naše web i facebook stranice
www.bichamilton.com